



喝價數

講著喝價數，無定著有一寡少年輩的朋友會捎無摠頭，我想喝價數應該就是華語所講的『拍賣』啦。

喝價數有幾若種，有親像以早的「喝玲瓏，賣雜細」彼種，嘛有親像魚、菜市場尾場的喝價數，大部份攏是愈喝價數愈低；閣有一種顛倒是價數愈喝愈懸，親像名畫、字帖、古物、佻玉器等等，價數定定喝甲會驚死人。落尾有一種號做義賣，就是有人會提物件出來拍賣，賣的錢額就用來做公益。

進前無佹久，一个拜六早起，阮朋友阿惠叫電話予我，講有一个公益活動欲踮阮社區舉辦，看我會當參加袂。是講彼日都無啥物代誌，甲是公益性的活動，閣佇阮社區舉辦，我平常時嘛足捷咧行街頭，若無去嘛講袂得過。

到位才知影，原來是有一陣少年人，欲成立一个公益性的社團，想欲替公民社會做一寡代誌，關係著大多數人的公共利益，當然嘛是大多數共同的願望。活動的煞尾，就有人捐 50 本冊出來予佢賣，加減填做基金。一本 350 箍無割引。

欲結束進前，主持人喝講猶有賸一本冊想欲提來拍賣，底價就是 350。拄開始就有人喝 400、500，喝到 600 箍的時陣煞停落來。彼當陣我當佇便所裡，就佇內底喝聲 700，自按呢就閣開始喝起去。喝到 1000 箍的時，又閣停落來。我一時想講按呢無啥好勢，閣出聲喝 1100。欸！哪會又閣無人喝聲？我看毋是勢，家己疊價喝聲 1200，按算欲共喝甲上 2000 箍。喝甲 1500 的時，就有人恁一个囡仔出來欲提冊矣，我就無閣再喝起去。雖然袂當喝到 2000 箍，有淡薄仔可惜，毋過嘛是感覺心適心適。

總是，社會上的公共事務，需要逐家共同來關心；為著公益的代誌，嘛著愛逐家做伙來參與，咱社會毋才會愈來愈進步，敢毋是咧？

作者：陳憲國

☆詞彙學習☆

- | | |
|-------------------------------|----------------------|
| 【喝價數】 huah kè-sià：喊價。 | 【毋是勢】 m̄-sī-sè：狀況不對。 |
| 【捎無摠頭】 sa bô tsáng-thâu：搞不清楚。 | 【疊價】 tháh-kè：加價。 |
| 【驚死人】 kiann-sí-lâng：嚇死人。 | 【進前】 tsìn-tsîng：之前。 |
| 【叫電話】 kiò tiān-uē：打電話。 | 【按算】 àn-sng：打算。 |
| 【割引】 kuah-ín：折扣。源自日語。 | |

☆文法學習☆

【.....裡】：閩南語的「裡(lí)」，作為實詞時，是指衣服的內襯，例如：「內裡(lai-lí)」；讀作輕聲調「--lih」或「--lìn」，意指在特定的空間範圍，例如：「水裡」、「路裡」、「厝裡」、「田裡」等。